

ICT ta un punto klave den Inovashon di Enseñansa

WILLEMSTAD

Grassroots ta un konsepto ku un a desaroyá na Canada i ta un instrumento pa motivá dosentenan, pa di un manera creativo hasi uso di e posibilidatnan ku ICT (Information, Communication Technology) ta brinda den enseñansa. Dosentenan di e forma aki ta haña hènens pa huntu ku nan alumnonan, kuminsá na un manera simpel ku un proyekto di ICT. Dosentenan ku presentá nan proyekto inovativo, ta bin na remarke pa finansiamentu, p.e. traha un tarea den lès di biología, hasiendo uso di un teleskop digital.

Grassroots Foundation Curaçao ke pa ICT okupá un lugá prominente den enseñansa di Kòrsou.

Lisensia pa software ta un punto hopi bon reglá na Ulanda na diferente otro pais. No solamente skolnan, pero tambe dosentenan di e skolnan ei por probechá kontra pago di un suma mínimo di uso di tur software legal. Na Ulanda e.o. SLB-diensten ta un empresa ku ta reglá esaki. Joost Wasch, Direktor di SLB-diensten, inspirá pa su amor pa Kòrsou, ta bisa ku Kòrsou tambe por bin na remarke pa e areglo aki, alegando, ku Antia tambe ta parti di Reino. Huntu ku Educos, di Louis Hilgers i Fundashon Bon Intenshon di Gregory Elias nan a funda Grassroots Foundation



Joost Wasch

Curaçao, p'asina duna un ehèmpel pa uso di ICT den enseñansa. Den e Grassroots project aki tin 3 skol ku ta fungi komo skol piloto i ku mester desaroyá proyektonan di ICT. Kada proyekto ku keda aprobá ta risibí un montante di Ang. 1000,- pa kompra di material pa ICT pa e skol. SLB-diensten i Fundashon Bon Intenshon ta enkargá ku e parti finansiero. Ku esaki e fundashon kier duna un empuhe nesario na uso di ICT den enseñansa. Kasi tur skol na Kòrsou tin kòmputer, pero hopi biaha ta trata di kòmputer "outdated" ku software bieu i hopi biaha e software aki ta ilegal. Kontrali na skolnan na Ulanda, skolnan na Kòrsou no tin mes tantu fondo, pero si tin e mes tantu kompromiso.

SLB-diensten a reglá ku e 3 skolnan piloto ku ta Radulphus College, Peter Stuyvesant College i Marnix College, ku nan ta haña e mesun areglo di lisensia ku skolnan na Ulanda. Basá riba e konvenio aki, a kuminsá eksplorá e posibilidat pa por inklui tur skol den e konvenio aki. Mester bisa si, ku te awor aki no tin masha ánimo p'esaki di parti di Gobièrnu ni di Direktiva di Skolnan, ya ku esaki ta kosta plaka. Un kalkulashon ta muestra, ku por duna tur skol na Kòrsou uso di software legal, for di skol di fundeshi te VVO i pa kual lo tin un suma enbolbí di aproksimadamente Ang. 150.000. Esaki ta un suma relativamente chikí pa tur skol di tur tipo di enseñansa na Kòrsou i nan maestronan por hasi uso legal di tur tipo di software. Mester muestra riba e

importansia di esaki, ya ku mester traha riba konsientisashon di esnan enbolbí i di Gobièrnu, ku no por sigui laga nos hóbennan hasi uso di software ilegal. Hasiendo esaki nos ta mandando asina un señal robes pa nos hubentut ku por sigui sin mas hasi uso di kosnan ilegal. Awor aki ta evaluando e proyektonan di Grassroots Curaçao i wak kon por bai planeá pa tur skol na Kòrsou por hasi uso di e proyekto aki, pero esaki solamente ta posibel ku tin un commitment di tur partner enbolbí den enseñansa i ku tin mas instansia tambe ta mira importansia di e proyekto aki. E proyekto aki a demostrá su importansia tambe, ya ku por traha huntu i tambe probechá di otro su profesionalismo. Kada skol por hasi petishon pa por ehekutá 15 proyekto, pues asina aki kada

skol por yega na e bunita montante di 15 mil florin pa nan skol. Meta di esaki ta, pa stimulá dosentenan ku no ta hasi bastante uso di ICT den enseñansa, pa stimulá nan pa hasi esaki. Banda di esaki Grassroots Curaçao ta ofresé diferente informashon, kurso i tambe un banko di informashon. Tambe ta krea den e proyekto aki e posibilidat ku skolnan ta traha ku otro, tantu lokal komo internashonal.

Bo por tira un bista riba e website di Grassroots Curaçao, www.grassrootscuracao.com i haña un bista di e diferente proyektonan ku skolnan a entamá i otro informashonnan ku tin riba e site. Grassroots Foundation ta hasiendo su máksimo esfuerso, pa konvensé Gobièrnu i Direktiva di Skolnan riba e importansia di ICT den enseñansa.

Marshe di informashon organisá pa Biblioteka Públiko Kòrsou un éksito rotundo!

WILLEMSTAD
Djasabra último, Biblioteka Públiko Kòrsou a klousurá e 'Luna di buki pa chikitiin'. Tabatin un marshe di informashon ku diferente sekshon informativo ku



instansianan ku tin di aber ku desaroyo di mucha, manera Wit Gele Kruis, Departamentu Salú Hubenil, FIDE, Stichting Kinderbescherming, Sentro Guia Edukashonal i eskritura di buki pa mucha, sra. Louët - Steba.

Den e auditorio di Biblioteka Públiko Kòrsou, Gini a kuminsá ku su presentashon interaktivo, unda el a ilustrá kon fásil ta pa mayoman saka informashon fo' i un buki i siña e muchanan kon importante ta pa kuida nan kurpa. Despues tio Ali i Ômpi Tin a animá e muchanan ku kuenta i rimanan baliabel, pa klousurá e fiesta ku Pòpchi Soli, ku su presentashon ku tambe a kai den bon tera serka e chikitinan.

Direktora di Biblioteka Públiko Kòrsou, sra. Gerda Willems a entregá un regalito na Pierrot Hurtado di RBTT pa su aporte na Biblioteka Públiko Kòrsou. Tambe a rekonosé Ava de Haan i su mayoman komo e famia ku a fia mas tantu buki den 2009.



EDIFISIO PA HÜR

300m2 ariba 300m2 abou
Hür ta fleksibel.
Hopi bon pa pakus pa paña pa dama.
patras di Dynasty
(èks edifisio Scandal) Saliña.
Pa informashon Tel. 521-6699